

七十二家集

孫馮翊集引

孫子荆盛為王武子所推戴
史稱其少乏鄉曲之譽非也
直是躑躅埃塵多所不屑耳
年少以枕漱自期晚甫解巾
神崖僂僂無失雲水間故吾

狎府主為僚儕凌朝賢如厮
隸何其抗也然絕影之薦傳
咸白社之載董京各有欽挹
非徒凌忽自豪者焉彼蓋尾
阮嵇之後塵而開晉世達伯
之首晨風零雨殆齊彭殤體

似真聲驢鳴當哭咄。人外
乃伉儷之際翻復未免有情
當是情緣文生耳子荆詩文
入梁選者各一章今錄其諸
體分為二卷雖少完製然磊
砢英多溢于毫楮觀笑賦及

及金人銘亦足徵棲寄所都
矣

紹和張爨識

孫馮翊集目錄

卷之一

賦

笑賦

登樓賦

同前

韓王臺賦

有序

井賦

雪賦

筮賦

有序

相風賦

菊花賦

蓮花賦

扶杜賦

有序

茱萸賦

鷹賦

有序

鴈賦

雉賦

蟬賦

詩

答弘農故吏民

除婦服詩

征西官屬送於陟陽侯作詩

太僕座上詩

祖道詩

之鴈翊祖道詩

卷之二

疏

龍見上疏

九品疏

取士疏

牋

薦傅長虞牋

謝賜鄣日牋

書

爲石苞與孫皓書

與董京書

董京答孫楚詩附

論

屈建論

頌

尼父頌

梁令孫侯頌

贊

莊周贊

榮啟期贊

原壤贊

顏回贊

管仲贊

季子贊

白起贊

樂毅贊

韓信贊

銘

友金人銘

石人銘

碑

故太傅羊祜碑

鴈門太守牽府君碑

哀文

和氏外孫道生哀文

和氏外孫小同哀文

附錄

孫楚傳

唐太宗

遺事

集評

孫馮翊集卷之一

晉太原孫楚子荆著

明閩漳張燮紹和纂

賦

笑賦

有度俗之公子總萬物之細故心髮髴乎巢由
以得意爲至樂不拘戀乎凡流會親戚於高宇
結宗盟於綢繆所以交頸偃仰摧曾指掌亢洪
聲於通谷順長風以流響氣參譚以相屬若將

頽而復往或嘖臧俛首狀似悲愁怫鬱唯轉叩
吟郁伊或攜手悲嘯嗟天長叶遲重則如陸沈
輕疾則如水漂徐疾任其口頰圓合得乎機要
或中路背叛更相毀賤傾倚巨我彫聲迄一日
晏信天下之笑林調謔之巨觀也

登樓賦

有都城之百雉加層樓之五尋從明王以登極
聊暇日以娛心涇渭汨以阻邁卉木鬱而成林
晞朝陽之素暉羨綠竹之茂陰望秦墳於驪山
觀八陵於北岑營巷基峙列宅萬區黎民布野
商旅充衢杞柳綢繆芙蓉吐芳俯依青川仰翳
朱楊體象濛汨幽若扶桑白日爲之晝昏鳥禽
爲之頡頏

同前

有都城之百雉加層樓之五尋從明王之登遊
聊暇日以娛心鳴鳩拂羽於桑榆游鳬濯翅於
素波牧豎吟嘯於行陌舟人鼓枻而揚歌百僚
雲集促坐華臺嘉肴滿俎旨酒盈杯談三墳而
詠五典釋聖哲之所裁

具載藝文首同四句
而末互異姑兩存之

韓王臺賦

左序

酸棗寺門外夾道左右有兩故臺訪諸故老云
韓王聽訟觀也

望韓王之故臺尋往代之所營雙闕礪以峻峙
貫雲氣而上征歷千載而特立顯妙觀於太清
薄耶鄆之叢臺陋楚國之章華邈岩巖以亢極
豈岑樓之能加至乃宮觀弘敞增臺隱天伐文
梓於萬仞發玉石於三泉優倡角烏鳥之聲蛾
眉戲白雲之舞紛滯衍以低仰翳修袖而容與

又

義丘陵之遷迤亞五嶽之嵯峨

井賦

倚崇丘以鑿井兮臨斥澤之淫沔若行潦之滓
濁兮靡清流以自娛乃喟爾而有感兮率鄰左
之數夫脉脉土以興泉兮登其醴於玄虛體象
圓川下貫五仞幽泉勝涌津澤傍潤抱甕而汲
不設機引絕彼淫飾安此樸慎俗尚其華我篤
其信旣處淫而不緇又磨之而不磷雖矢志而
無妄實游心於大順涓人來翔行旅是賴輟耕
息肩不期而會沈黃李浮朱柰雜狸首之斑如

孫馮翊集

卷一

四

飛清塵以洮汰枕玄石以盥漱喜遨怡以緩帶

雪賦

堯九載以山栖兮湯請禱於桑林罔二聖以濟
世兮孰繁衍以迄今嗟亢陽之踰時兮情反側
以寢興豐隆灑雪交錯翻紛膏澤偃液普潤中
田肅肅三麥實獲豐年

笳賦 有序

頃還北館過華髮人於澗水之濱向春風而吹
長笳音聲寥亮有感余情爰作斯賦

銜長葭以泛吹噉啾啾之哀聲奏胡馬之悲思
詠北狄之遐征順谷風以撫節飄逸響乎天庭
爾乃調唇吻整容止楊清臚隱皓齒徐疾從宜
音引代起叩角動商鳴羽發徵若夫廣陵散陰
三節白紵太山長曲哀及梁父似鴻雁之將雛
乃群翔於河渚

相風賦

伊聖皇之高烈美治術之穆清兼乾坤之普覆
齊三光之朗明猶恭已以勞謙迄日昃而不寧
慮聽政之有闕誠禍福於無形建殊才於辰極
櫛相風於紫庭爾乃神獸盤其根靈鳥據其顛
羽族翩飄羅其側翔風蕭聊出其間

菊花賦

彼芳菊之爲草兮，禀自然之醇精。當青春而潛
翳兮，迄素秋而敷榮。於是和樂公子，雍容無爲。
翩翩華林駿足，交馳薄言采之。手折纖枝，飛金
英以浮旨酒。拂翠葉以振羽儀，偉茲物之珍麗。
今超庶類而神奇。

蓮花賦

有自然之麗草育靈沼之清瀨結根係於重壤
森蔓延以騰邁爾乃紅花電發暉光燁燁仰曜
朝霞俯照綠水潛紉房之奧密兮含珍藕之甘
腴攢聚星列纖離相扶微若玄黎披幽夜粲若
鄧林飛鵠雛

杖杜賦

家弟以虞氏梨賦見示余謂豈以梨有用之爲貴杜無用之爲賤故無用獲全所以爲貴有用獲殘所以爲賤故賦云爾

惟有杖之爲杜齊萬物而竝生其質非薄旣不施於器用華葉踈悴靡休陰之茂榮昔在邵伯聽訟述職甘棠作頌垂之罔極

茱萸賦

有茱萸之嘉木植茅茨之前庭歷漢女而始育
關百載而長生森蔓延以盛興布綠葉於紫莖
鶉火西徂白藏授節零露既凝鴈隼飄颻攀紫
房於纖柯綴朱實之酷烈應神農之本草療生
民之疹疾

鷹賦 有京

郭延考與余厚其從者講二鷹以侍側郭邊人
也好弋獵顧盼心欲自娛樂請余爲賦曰

有金剛之俊鳥生井陘之巖阻超萬仞之崇嶺
蔭青松以靜處體勁悍之自然振肅肅之輕羽
擒狡兔於平原截鴻鴈於河渚且其爲相也疏
尾濶臆高髻禿顙深目蛾眉狀似愁胡曲背短
頸足若雙枯麾則應機招則易呼背碣石以西
遊經馬嶺而南徂于時商秋旣邁歲在玄冥風

霜激厲羽毛振驚爾乃策良驥服羔裘鞞青骹
戲田疇縈深谷繞山丘定心意審精眸獸馳厥
足鳥矯其翼下赴幽谿上翔辰極隨指授以騰
踴因升降以畢力紛連薄以櫻窺遂陷首以摧
臆

鴈賦

有逸豫之雋禽稟和氣之清冲候天時以動靜
隨寒暑而汚隆颺同集于曠野紛群翔於雲中
翳朝陽之景曜角聲勢於晨風族類阜繁數則
千億迎素秋而南遊背青春而北息泝長川以
鳴號凌洪波以鼓翼任自然而相伴窮天壤於
八極

雉賦

體冲和之淑質飾羽儀於茂林斑五色之文章
揚皦皦之清音設密網於巖阿飛輕繳之雲浮
上無逃而弗獲下無隱而不搜遂戢翼以就養
隨籠栖而言歸恒逍遙於階庭廕朝陽之盛暉

蟬賦

惟大化之廣御何品數之多名當仲夏之始出
據長條而悲鳴翼如羅纏形如枯槁終日不銜
一粒激哀響之煩擾

詩

答弘農故吏民

昔我先侯邁德垂化康哉之詠實由良佐惟余
忝辱弗克負荷每歷貴邦仰瞻泰華追慕先軌
感想哀嗟詵詵臣故爰及群士皓首老成率彼
邑里闡崇高義長幼以齒

除婦服詩

婦胡母氏也

時邁不停日月電流神爽登遐忽已一周禮制
有叙告除靈丘臨祠感痛中心若抽

征西官屬送於陟陽侯作詩

晨風飄岐路零雨被秋草
傾城遠追送餞我千里道
三命皆有極咄嗟安可保
莫大於殤子彭殤猶爲天
吉凶如糾繆憂喜相紛繞
五臣作擾天地爲我鑪萬物一何小
達人垂大觀誠此苦不早
乖離卽長衢惆悵盈懷抱
孰能察其心鑒之以蒼昊
齊契在今朝守之與偕老

太僕座上詩

以下闕文

朝欽厭庸出尹京
畿廻授太僕四牡駢駢綠耳

盈箱翠華歲黷動齊庭實增國之輝

祖道詩

仰天惟龍御地以驥利有攸往不期而至

之馮翊祖道詩

舉翮撫三秦抗我千里目念當隔山河執觴懷
慘毒

人亦有言瑜瑕弗藏朗公罔罔能韞其光敬終
慎始研覈微章何以取證冰堅履霜

劉元真贊

索索虛衿翳翳閑冲誰其體之在我劉公談能
雕飾照足開矇懷抱之內豁爾每融

支孝龍贊

小方易擬大器難像盤桓孝龍尅邁高廣物競
宗歸人思効仰雲泉彌漫蘭風盼響

法威贊

易曰翰白詩美蘋藻班如在場芬若停滌于威
明法介然遐討有絜其名無愧懷抱

笠法汰贊

凄風拂林鳴絃映壑爽爽法汰校德無忤

孫馮翊集卷之二

晉太原孫楚子荆著

明閩漳張燮紹和纂

疏

龍見上疏

頃聞武庫井中有二龍群臣或有謂之禎祥而
稱賀者或有謂之非祥無所賀者可謂楚旣失
之而齊亦未爲得也夫龍或俯鱗潛于重泉或
仰攀雲漢游乎蒼昊而今蟠于坎井同於蛙蝦

者豈獨管庫之士或有隱伏厮役之賸沒於行
伍故龍見光景有所感悟願陛下赦小過舉賢
才垂夢於傳巖望想於涓濱脩學官起淹滯申
命公卿舉獨行君子可惇風厲俗者又舉亮拔
秀異之才可以撥煩理難矯世抗言者無繫世
族必先逸賤夫戰勝攻取之勢并兼混一之威
五伯之事韓白之功耳至於制禮作樂闡揚道
化甫是士人出筋力之秋也伏願陛下擇狂夫
之言

九品疏

九品漢氏本無班固著漢書序先往代賢智以
九條此蓋記鬼錄次第耳而陳群依之以品生
人又魏武拔奇決於胸臆收人才不問階次豈
賴九品而後得人今可令長守爲小大中正各
自品其編戶也

取士疏

當今士子繁多畧以萬計常患官少才多無地
以處秀才自別是一種仕官非若漢代取人之
例也假若秀才對五問可稱孝廉答一策能通
此乃雕蟲小道何關理功得人以此求才徒虛
語爾

牋

薦傅長虞牋

楚聞騏驎不遺能於伯樂良寶不藏輝於卞和
是以輝光夜射價連秦趙飛駟絕影終朝千里
物尚有之士亦宜然

謝賜鄣日牋

大恩賜鄣日其器雖小而禮遇甚弘昔衛綰錫
六劍珍而不用楚雖不斂且受而藏之

書

爲石苞與孫皓書

蓋聞見機而作周易所貴小不事大春秋所誅
此乃吉凶之萌兆榮辱之所由興也是故許鄭
以銜璧夫全國曹譚以無禮取滅載籍旣記其成
敗古今又著其愚智矣不復廣引譬類崇飾浮
辭苟以夸大爲名更喪忠告之實今粗論事勢
以相覺悟昔炎精幽昧曆數將終桓靈失德灾
釁竝興豺狼抗爪牙之毒生人陷塗炭之艱於

是九州絕貫皇綱解紐四海蕭條非復漢有太祖承運神武應期征討暴亂克寧區夏協建靈符天命旣集遂廓洪基奄有魏域土則神州中岳器則九鼎猶存世載淑美重光相襲固知四隅之攸同天下之壯觀也公孫淵承藉父兄世居東裔擁帶燕胡憑陵險遠講武盤桓不供職貢內傲帝命外通南國乘桴滄流交疇貨賄葛越布於朔土貂馬延乎吳會自以爲控弦十萬奔走足用信能右折燕齊左振扶桑陵轢沙漠

南面稱王也宣王薄伐猛銳長驅師次遼陽而
城池不守桴鼓一震而元兇折首然後遠跡疆
場列郡大荒收離聚散咸安其居民庶悅服殊
俗款附自茲遂隆九野清泰東夷獻其樂器肅
慎貢其楷矢曠世不羈應化而至巍巍蕩蕩想
所共聞吳之先主起自荊州遭時擾攘播潛江
表劉備震懼亦逃巴岷遂依丘陵積石之固三
江五湖浩汗無涯假氣游魂迄于四紀二邦合
從東西唱和互相扇動距捍中國自謂二分鼎

足之勢可與泰山共相終始相國晉王輔相帝
室文武栢栢志厲秋霜廟勝之筭應變無窮獨
見之鑒與衆絕慮主人欽明委以萬機長轡遠
御妙略潛授偏師同心上下用力陵威奮伐衆
入其阻并敵一向奪其膽氣小戰江介則成都
自潰曜兵劍閣而姜維面縛開地五千列郡三
十師不踰時梁益肅清使竊號之雄稽顙絳闕
球琳重錦充於府庫夫韓并魏徙虢滅虞亡此
皆前鑒之驗後事之師也又南中呂興深視天

命蟬蛻內向願爲臣妾外失輔車唇齒之援內
有毛羽零落之漸而裴回危國冀延日月此猶
魏武侯却指河山以自彊大殊不知物有興亡
則所美非其地也方今百僚濟濟雋乂盈朝虎
臣武將折衝萬里國富兵彊六軍精練思復翰
蜚飲馬南海自頃國家整脩器械脩造舟楫簡
習水戰伐樹北山則太行木盡濬決河洛則百
川通流樓船萬艘千里相望自刳木以來舟車
之用未有如今之盛者也驍勇百萬畜力待時

役不再舉今日之謂也然主上眷眷未便電邁
者以爲愛民治國道家所尚崇城遂早文王還
舍故先開示大信喻以存亡殷勤之旨往使所
究若能審識安危自求多福蹶然改容祇承往
告追慕南越嬰齊入侍北面稱臣伏聽告策則
世祚江表永爲藩輔豐報顯賞隆於今日矣若
侮慢不式王命然後謀力雲合指麾風從雍益
二州順流而東青徐戰士列江而西荆楊兗豫
爭馳八衝征東甲卒虎步秣陵爾乃皇輿整駕

六師徐征羽枝燭日旌旗流星游龍曜路歌吹
盈耳士卒奔邁其會如林煙塵俱起震天駭地
渴賞之士鋒鏑爭先忽然一旦身首橫分宗祀
屠戮取誠萬世引領南望良以寒心夫治臂商
者必進苦口之藥決狐疑者必告逆耳之言如
其迷謬未知所投恐俞跗見其已困扁鵲知其
無功也幾思良圖惟所去就

與董京書

京與隴西計吏俱至洛陽被髮而行道
遙吟咏常宿白社中時乞於市孫楚數
就社中與京語載以俱歸京
不肯至楚貽之書京答以詩

今堯舜之世胡爲懷道迷邦

董京答孫楚詩附

周道數兮頌聲沒夏政衰兮五常汙便便君
子顧望而逝洋洋乎滿目作者七豈不樂天
地之化也哀乎哉時之不可與對之以獨處
無娛我以爲歡清流可飲至道可餐何爲栖

栖自使疲單魚懸獸檻鄙夫知之古之至人
藏器如霧縕袍不能令暖軒冕不能令榮動
如川之流靜如川之停鸚鵡能言泗濱浮磬
衆人所翫豈合物情玄鳥紆幕而不被害鳴
隼遠巢咸以欲死盼被梁魚逡巡倒尾沈吟
不決忽焉失水嗟乎魚鳥相與萬世而不悟
以我觀之乃明其故焉知不有達人深穆其
度亦將闕我顰顙而去萬物皆賤惟人爲貴
動以九州爲狹靜以園堵爲大

論

屈建論

加邈之品菱菱存焉楚多陂塘菱所生久自嗜
之而抑按宰祝旣毀就養無方之禮又失奉死
如生之義奪平素欲建何忍焉

頌

尼父頌

皇矣尼父聖哲之傑德比天地明齊日月周室
陵遲大道蕪穢禮樂崩阻姦雄罔世乃養門徒
廣延俊乂垂訓列國頌聲魯衛威震夾谷義厭
陳蔡德之休明幽而彌泰超美三代風馳雲邁

梁令孫侯頌

於穆君侯英才宣朗神鑒將來思通既往受佐
陝西臨我邦壤聲之所振下應如響明斷決疑
易於指掌野有寇盜惟侯屏之我有田疇惟侯
闢之古人慎獄惟侯平之凡此三惠如何勿思

贊

莊周贊

莊周曠蕩高才英儁本道根貞歸於大順妻亡
不哭亦何所懼慢弔鼓缶放此誕言殆矯其情
近失自然

榮啟期贊

榮公溫雅旣怡旣懌濁以徐清寂然澹泊援琴
自娛詠此三樂眉壽無彊惟德之宅

原壤贊

壤之輶張絕滅禮教實交仲尼同機合奧聖以
之臧俗以之笑獨協區外孰知其妙

顏回贊

束身勵行宗事聖道鑢仰孜孜視予猶考

管仲贊

管生變弓與桓是讐駿奔從糾塊爲纍囚沐浴
西郊鸞飛詹丘

季子贊

季子聰哲思心精微玄覽幽審觸類應機

白起贊

烈烈桓桓時唯武安神機電斷氣濟師然南折
勁楚走魏禽韓北摧馬服淩川成丹應侯無良
蘇子入關噉噉讒口火燎于原遂焚杜郵與蕭
俱燔惟其歿矣古今所歎

樂毅贊

樂生誕節實立弘度丹旌電麾秦韓景附威震
濟西齊愍失據惠之不敏翻然高翥栖遲一丘
以保皓素

韓信贊

淮陰屈節盤於幽賤秦失其鹿英雄交戰踐楚
知亡撫戈從漢遂寤明主超然虎奮威震趙魏
擒項平難割據山川稱孤南面惜哉遘疑一朝
書叛

銘

反金人銘

晉太廟有石人焉大張其口而書其脅曰我古
之多言人也無少言無少事少言少事則後生
何述焉夫唯立言名乃長久胡爲塊然生鉗其
口凡夫貪財烈士殉名盜跖爲濁夷柳爲清鮑
肆爲臭蘭圃爲馨莫貴澄清莫賤滓穢二者言
異歸於一會堯懸諫鼓舜立謗木聽采風謠惟
日不足道潤群生化隆比屋末葉陵遲禮教彌

衰承旨則順忤意則違時好細腰官中皆饑時
悅廣額下作細眉逆龍之鱗必陷斯機括囊無
咎乃免誅夷顛覆厥德可爲傷悲則可用戒無
妄之時假說周廟於言爲蚩是以君子追而正
之

石人銘

大象無形元氣爲母杳兮冥兮陶冶衆有

碑

故太傅羊祜碑

稟二儀之純靈膺造化之冲氣文爲辭宗行作
世表遷黃門侍郎受祕書監公筭滅吳之略以
爲孟獻營虎牢而鄭人懼晏弱城東陽而萊子
服乃進據險處開建五城收膏腴之地奪敵人
之資於是江浦馳義槩負而至雖研精軍政用
思滅敵然兼立學校闡揚典訓是以縉紳之士
鱗集仰化雲翔衡門雖泮官之詠魯侯菁莪之

美育才無以過也銘曰

金德發曜惟公作輔肇造嘉謨建我民主不愆
遺公俾屏聖皇哲人其徂孰不增傷

鴈門太守牽府君碑

君體德允直才量高潔明鑒達於世變弘教足
以致遠事振鴻翼於袞塵之表卓膺先序於擬
議之前君與蜀備少長河朔英雄同契爲刎頸
之交俄而變質於太祖備遂鼎足於蜀漢所交
非常焉時所忌每自酌損在乎季孟之間遷鴈
門太守教民耕戰聽斷以情信賞必罰下服其
命是以夷狄窘迫罔知所安譬秋枯之隕晨風
激雹之不及掩耳也伐叛柔服威震沙漠遺種

遠迹萬里無煙

烈烈君侯文武允崇少兼七德翰飛撫戎名揚
河朔威鎮漢中臨危運奇在難匪從烈旌東麾
撫司徐青截彼降賊海岱以平剖符千里爲國
干城

哀文

和氏外孫道生哀文

嗟爾道生和氏之寶玉顏豐下曜於懷抱暮春
而育孟冬而夭二十三旬奇于五日方之期願
百分之一命之脩短始則有終誰能長久與天
無窮錢翁近千殤子幼冲俱反無形冥昧之中
造化多少豈獨爾躬

和氏外孫小同哀文

曄曄薤華朝生夕落爾命方之猶爲淺薄暫有
冥質尋反冥漠譬彼蜉蝣不識晦朔死尚未知
生亦焉知爾雖旬月我未之視萬物混焉天地
一指杪末嬰孩安足稱誅大人達觀同之一揆

附錄

孫楚傳

唐太宗

孫楚字子荆太原中都人也祖資魏驃騎將軍父宏南陽太守楚才藻卓絕爽邁不群多所陵傲缺鄉曲之譽年四十餘始叅鎮東軍事文帝遣符劭孫郁使吳將軍石苞令楚作書遺孫皓劭等至吳不敢爲通楚後遷佐著作郎復叅石苞驃騎軍事楚旣負其材氣頗侮易於苞初至長揖曰天子命我叅卿軍事因此而讎隙遂構

苞奏楚與吳人孫世山共誦毀時政楚亦抗表
自理紛紜經年事未判又與鄉人郭奔忿爭武
帝雖不顯明其罪然以少賤受責遂湮廢積年
初叅軍不敬府主楚旣輕苞遂制施敬自楚始
也征西將軍扶風王駿與楚舊好起爲叅軍轉
梁令遷衛將軍司馬時龍見武庫井中群臣將
上賀楚言龍蟠坎井下有伏才請起淹滯惠帝
初爲馮翊太守太康三年卒初楚與同郡王濟
友善濟爲本州大中正訪問銓邑人品狀至楚

濟曰此人非卿所能目吾自爲之乃狀楚曰天才英博亮拔不群楚少時欲隱居謂濟曰當欲枕石漱流誤云漱石枕流濟曰流非可枕石非可漱楚曰所以枕流欲洗其耳所以漱石欲厲其齒楚少所推服惟雅敬濟初楚除婦服作詩以示濟濟曰未知文生於情情生於文覽之悽然增伉儷之重三子衆洵纂衆及洵俱未仕而早終惟纂子統綽竝知名

史臣曰孫楚體英絢之姿超然出類見知武子

誠無魏色覺其貽皓之書諒曩代之佳筆也而
負才誕倣蔑苞忿奔遄遜讓之道肆陵憤之氣
十年沉廢蓋自取矣

遺事

王武子孫子荆各言其土地人物之美王云其地坦而平其水淡而清其人廉且貞孫云其山峩巍以嵯峨其水洄渌而揚波其人磊砢而英

多

世說新語

孫子荆唯敬王武子武子喪時名士無不至者子荆後來臨屍慟哭賓客莫不垂涕哭畢向靈牀曰卿常好我作驢鳴今爲卿作體似真聲賓客皆笑孫舉頭曰使君輩存令此人死

世說新語

孫楚有酒樓在金陵城西李白詩云昨翫西城
月青天垂玉鉤朝沽金陵酒歌吹孫楚樓

應天
府志

集評

孫楚綴思每直置以疎通

文心
雕龍